

INUIT ATAQATIGIIT INATSISARTUNI



30. august 2016

UKA 2016/45

Naqqiut

Siunnersuut 19. juli 2016-imeersoq taarserpaa.
(Tunngavilersuutaa naqqiuteqarpoq)

Inatsisartut suleriasianni § 33 naapertorlugu aaliangigassatut siunnersuut imaattoq matumuuna saqqummiuppara:

Naalackersuisut UKA2017mut eqqumiitsuliortut suliaminnik pilersitsilertuinissaanut aningaasanik inatsimmit tunniunneqartartut pillugit aningaasaateqarfimmik pineqartunik agguaassisussatut inissinneqartussatut atugassiamik aningaasaateqarfiliornissaq anguniarlugu periarfissaasinnaasunik misissuinissamut Naalackersuisut UKA2017mut peqquneqarnissaanik Inatsisartunut aalajangiiffigisatut siunnersuut. Misissuininermi ilanngullugu misissorneqassaaq eqqumiitsuliornermut isumalioqatigiissitamik pilersitsinissaq qulaani taaneqartunik aningaasaliissutinik agguaassinissanik ingerlatsiviusussamik piviusunngortinneqarnissaa.

(Inatsisartunut ilaasorta, Peter Olsen, Inuit Ataqatigiit)

Tunngavilersuut:

Matumuuna aningaasanut inatsimmiittunik eqqumiitsuliornermut aningaasaliuuttakkatsinnik agguaasartussamik eqqumiitsuliornermut aningaasaateqarfimmik pilersitsisoqarnissaa siuner-taralugu periarfissaasinnaasunik misissueqqullugit naalackersuisut peqquneqarnissaanik siunnersuuteqarpunga. Misissugassanut ilanngunneqassaaq aningaassanik agguaasartussanik eqqumiitsuliornermut siunnersuisoqatigiinnik pilersitsisinnaanermik periarfissanik ujartuineq.

Missuinerup inernera inatsisartunut agguaanneqareersimassaaq kingusinnerpaamik UKA 2017-mi.

Eqqumiitsuliornermut aningaasaateqarfik.

Eqqumiitsuliornermut aningaasaateqarfiup pilersinneqarneratigut Eqqumiitsuliornikkut Pinnngorartitsisut Ingerlatsisullu qangarsuummalli kissaataat piviusunngortissagaluarparput, tassaasoq; Tusaaneqarnerulerneq, peqataatinneqarnerulerneq minnerunngitsumillu nammine-erluni aningaasaateqarfimmik aqutseqataalernikkut akisussaaffimmik annerusumik tunineqar-neq.

Ullumikkut ukkaffiginngippallaarparparput filmiliornikkut nipilersornikkullu nunatta avataanut tunisassiuulersinnaanerput. Filmiliornikkut nipilersornikkullu pikkorissortagut ineriartoqqissin-naanissaannut nutaalioqqissinnaanerannullu periarfissaat ullumikkorninngarniit pitsaanerujus-suusariaqarput.

Filmiliornikkut nipilersornikkullu nutaaliorneq misileraanerlu suli nukinnik amerlanerujussuarnik atuiffiginerusariaqalerparput, taamaaliornitsigut nunarsuatta sinnerani pisiarineqarsinnaasunik sanaartornerput tunisassiorsinnaanerporlu aatsaat aqutissiuussinnaalissagaluaratsigu.

Atuagaq taassumalu kingorna filmiliarineqarsimalluni tusaamarsuannngortoq nuannarineqaji-sorlu Harry Potter assersuutitut taaginnarsinnaavarput. Unnia atuagaq filmitaalu taanna saqqumermata tuluit nunaata aningaasaqarneranut iluaqutaalluangaatsiarsimasoq.

Nipilersornerup silarsuaannut saakkutta qallunaat Aqua-kkut qiviaannarsinnaavagut. Taamani nunarsuarmi tamani nuannarineqaqisoq Barbie Girl saqqummersimmassuk unnia qallunaat nunaata karsianut iluaqutaarujussuarnikuusimasoq aamma tusaamalersimavarput.

Scandinaaviami misissuinikkut, ilaatigut DMF-ip (Dansk Musiker Forbund) peqataaffigisaanik, uppersissimavaat eqqumiitsuliornikkut nunap karsianiit taperneqarnikkut aningaasat inuiaqatigiinni kaaviiareerlutik nunatta karsianut uteqqittartut nunap iluaqutissaanik. Tassa 100 kruuni eqqumiitsuliornermut atorreqarpat 300 kruuninngorluni, naak namminersortunut aningaasaliissutit 100 kruuniuppata 157 kruuninnguinartartut.

Naatsumik oqaatigalugu eqqumiitsuliornikkut pinngorartitsineq aningaasartuutaannartut isigi-unnaarlugu, aningaasarsiorfiullalersinnaasutullu allatulli isigineqartariaqalerpoq.

Eqqumiitsuliortortatta ilannguat ataasiinnannguarluunniit torrallaappat nunatsinnut tamanut aningaasaqarnikkut iluaqutaarujussuartaassaavoq.

Eqqumiitsuliortut nutaaliortut ilisarnaatigikkajuttarpat taakkuukkajummata nunatsinni tuniuminaannerpaasumik nipilersoriaaseqartut, taakkuuppulli aamma nunatta avataaniit soqutigineqarnerpaasartut.

Avammut tunisassiassaannartuunngitsoq, aammali nunarput avammut nittarsassavaat, takornariaqarnermullu iluaqutaassalluni.

Taamaattumik alloriaqqinnissatsinnut ingerlariaqqinnissatsinnullu aqutissat ilaat tassaavoq eqqumiitsuliornermut aningaasaateqarfimmik siunnersuisoqatigiinnilli pilersitsineq.

Siunnersuisoqatigiit pilersinneqartussat akisussaaffimmik aningaasanillu aqutassaminnik tunineqassapput:

Siunnersuisoqatigiit, aningaasaateqarfimmik aqutsisussatut pilersinneqartussat naalakkersuisoqarfimmiit pilersinneqassapput, qangalu kulturikkut siunnersuisoqatigiinnik pilersinneqarsimasutut isikulimmik pilersinneqarsinnaalluni. Siunnersuisoqatigiinuinnaratilli aningaasanik, nammineq aqutassaminnik agguataagassaminnillu aamma tunineqartassallutik.

Aningaasanut inatsimmiittartut ukiut tamaasa eqqumiitsuliornermut aningaasaliissutigisartakkagut siunnersuisoqatigiinniit akisussaaffigineqalersinnaanerak takorluukkatta ilagisinnaavaat.

Qujanaq neriullunga siunnersuutiga ilassilluarneqarumaartoq.

Pisortanut aningaasatigut allaffissornikkullu kingunerisassat.

Siunnersuut akuerineqarpat Namminersorlutik Oqartussat (AC Ørsværk) kr. 500.000-missaanik aningaasartuuteqassasut naatsersuutigineqarpoq. Imaluunniit allatut oqaatigalugu ukiup affaa atorfilittat marluk sulinerannik naleqassangatinneqarpoq.

Namminersorluni inuussutissarsiuteqarnermut aningaasatigut allaffissornikkullu kingunerisassat.

Soqanngilaq

Innuttaasunut aningaasatigut allaffissornikkullu kingunerisassat.

Eqqumiitsuliornikkut suliaqartunut aningaasarsiaqarnikkut iluaqutaassaq.